



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“ broj 96/13 i i 89/16) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“ broj 103/08), izdajem

### IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2016. GODINU NOVOG POKRETA BOSNE I HERCEGOVINE

Broj: 03-07-6-673/17  
Sarajevo, 27. april 2018. godine

## SADRŽAJ

MIŠLJENJE REVIZORA .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS PREGLEDA I KONTROLE FINANSIJSKOG IZVJEŠTAJA .....	4
Predmet pregleda i kontrole.....	4
Cilj pregleda i kontrole .....	4
Obim pregleda i kontrole .....	5
4. PRETHODNE KONTROLE I REVIZIJE .....	5
5. NALAZI I PREPORUKE .....	5
5.1. NALAZI.....	5
5.2. PREPORUKE .....	6

## MIŠLJENJE REVIZORA

Služba za reviziju finansiranja političkih stranaka je izvršila pregled godišnjeg finansijskog izvještaja Novog pokreta Bosne i Hercegovine za 2016. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskog izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

**Pregledom godišnjeg finansijskog izvještaja za 2016. godinu, utvrđeno je da je Novi pokret Bosne i Hercegovine prekršio odredbe člana 12. stav (4) Zakona o finansiranju političkih stranaka.**

**Na osnovu našeg pregleda, odnosno kontrole finansijskog izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Novog pokreta Bosne i Hercegovine za 2016. godinu.

Pregled i kontrola finansijskog izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Novi pokret Bosne i Hercegovine se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica ( 3-a )	0,00	0,00
3.	Prilozi pravnih lica ( 3-b )	0,00	0,00
4.	Prihodi od imovine ( 3-c )	0,00	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	0,00	0,00
7.	Prihodi iz budžeta ( 3-f )	4.101,80	100,00
8.	Prihodi od propagande ( 3-g )	0,00	0,00
<b>I</b>	<b>Ukupni prihodi (1-8)</b>	<b>4.101,80</b>	<b>100,00</b>
<b>II</b>	<b>Ostali prihodi i drugo</b>	<b>0,00</b>	<b>0,00</b>
	<b>Izvori finansiranja (I+II)</b>	<b>4.101,80</b>	<b>100,00</b>

U godišnjem finansijskom izvještaju stranka je iskazala rashode u ukupnom iznosu od 3.509,45 KM.

## 2. PREDSTAVLJANJE POLITIČKE STRANKE

Naziv političke stranke je Novi pokret Bosne i Hercegovine. Skraćeni naziv je Novi pokret BiH.

Novi pokret Bosne i Hercegovine je registrovan kod Općinskog suda u Sarajevu Rješenjem broj: 065-0-F1-12-000011 od 25.04.2012. godine, sa sjedištem u Sarajevu, ulica Tvornička 3.

Lice ovlašteno za zastupanje stranke je Enes Zeković, predsjednik.

Lice ovlašteno za podnošenje finansijskih izvještaja za 2016. godinu je Fahrija Nalić.

Prema podacima iz godišnjeg finansijskog izvještaja za 2016. godinu, Novi pokret Bosne i Hercegovine ima dva organizaciona dijela:

- Organizacioni dio u Kantonu Sarajevo i
- Organizacioni dio u Bosansko-podrinjskom kantonu.

## 3. OPIS PREGLEDA I KONTROLE FINANSIJSKOG IZVJEŠTAJA

**Predmet pregleda i kontrole** je godišnji finansijski izvještaj Novog pokreta Bosne i Hercegovine za 2016. godinu.

**Cilj pregleda i kontrole** je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka. Ukoliko revizor na bazi kontrole finansijskog izvještaja utvrdi određena kršenja

zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

**Obim pregleda i kontrole** finansijskog izvještaja Novog pokreta Bosne i Hercegovine obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

#### **4. PRETHODNE KONTROLE I REVIZIJE**

Služba za reviziju je izvršila pregled godišnjih finansijskih izvještaja Novog pokreta Bosne i Hercegovine u periodu od 2012. do 2015. godine, nakon kojih su izdati izvještaji o pregledu sa mišljenjem revizora, nalazima i preporukama revizije.

Nakon zvršenog pregleda godišnjeg finansijskog izvještaja za 2015. godinu, izdat izvještaj o pregledu sa mišljenjem revizora, nalazima i preporukama stranci da poslovne knjige vodi u skladu sa računovodstvenim propisima, da uspostavi potpune evidencije o svojim rashodima i da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2016. godinu, utvrđeno je da Novi pokret Bosne i Hercegovine nije ispoštovao preporuke revizije.

#### **5. NALAZI I PREPORUKE**

##### **5.1. NALAZI**

#### **Novi pokret Bosne i Hercegovine nije postupio u skladu sa odredbama člana 12. stav (4) Zakona o finansiranju političkih stranaka.**

Na osnovu finansijskog izvještaja i finansijske dokumentacije koju je na zahtjev Centralne izborne komisije BiH dostavila politička stranka, utvrđeno je da stranka finansijski izvještaj nije podnijela u zakonom propisanom roku i na način kako je propisala Centralna izborna komisija BiH<sup>1</sup>.

- (1) Novi pokret Bosne i Hercegovine nije, u skladu sa odredbama člana 12. stav (4) Zakona o finansiranju političkih stranaka i odredbama člana 3. stav (1) Pravilnika o godišnjim finansijskim izvještajima političkih stranaka, godišnji finansijski izvještaj podnio u elektronskoj formi putem aplikacije „FI CIK BIH” koju je razvila Centralna izborna komisija BiH.

Politička stranka je bila dužna da godišnji finansijski izvještaj za 2016. godinu podnese do 31.03.2017. godine u elektronskoj formi, putem aplikacije „FI CIK BIH” i da Centralnoj izbornoj komisiji BiH dostavi potvrdu o podnesenom finansijskom izvještaju u elektronskoj formi i obrasce finansijskog izvještaja, odštampane iz aplikacije u PDF formatu, ovjerene potpisom ovlaštenog lica i pečatom političke stranke.

- (2) Godišnji finansijski izvještaj, u koji je stranka manuelno unijela podatke, Centralnoj izbornoj komisiji BiH je dostavila 11.04.2017. godine, odnosno nakon zakonom propisanog roka. U finansijskom izvještaju, pored činjenice da isti nije podnesen u skladu sa odredbom iz člana 3. stav (1) Pravilnika o godišnjim finansijskim izvještajima političkih stranaka, stranka nije iskazala tačne podatke o svojim rashodima, dok obaveze na dan 31.12.2016. godine uopšte nije prijavila.

---

<sup>1</sup> U skladu sa odredbom iz člana 12. stav (4) Zakona, politička stranka podnosi finansijski izvještaj u formi koju odobri Centralna izborna komisija Bosne i Hercegovine

- Plaćene obaveze dobavljačima po osnovu usluga koje su stranci pružene prije izvještajnog perioda, u iznosu od 2.253,07 KM i otplatu dijela zajma fizičkom licu, u iznosu od 550,00 KM, stranka je u finansijskom izvještaju iskazala kao troškove izvještajne godine, čime je prekršila odredbe člana 22. Pravilnika o godišnjim finansijskim izvještajima političkih stranaka.
- U finansijskom izvještaju stranka nije iskazala obaveze u iznosu od 37.759,40 KM, od čega obaveze po osnovu pozajmica od pet fizičkih lica u iznosu od 36.221,10 KM<sup>2</sup> i obavezu prema pravnom licu dobavljaču stranke, u iznosu od 1.538,40 KM<sup>3</sup>. Neiskazivanjem obaveza u finansijskom izvještaju Novi pokret Bosne i Hercegovine je prekršio odredbe člana 24. Pravilnika o godišnjim finansijskim izvještajima političkih stranaka.

## 5.2. PREPORUKE

*Preporučuje se Novom pokretu Bosne i Hercegovine da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da finansijske izvještaje podnosi u zakonom propisanim rokovima i formi koju je Centralna izborna komisija BiH propisala svojim podzakonskim aktima, odnosno Pravilnikom o godišnjim finansijskim izvještajima političkih stranaka.*

### **KOMENTAR:**

U ostavljenom roku, Novi pokret Bosne i Hercegovine nije se očitovao na nalaze revizije i mišljenje revizora dato u Preliminarnom izvještaju o pregledu godišnjeg finansijskog izvještaja za 2016. godinu.

Pomoćnik revizora

Mr.sc. Goran Cicović

Šef Službe za reviziju, revizor

Mr. sc. Hasida Gušić

---

<sup>2</sup> Obaveza prema Zeković Enesu, predsjedniku stranke, u iznosu od 25.171,00 KM, Nalić Fahriji, licu ovlašteno za podnošenje finansijskih izvještaja, u iznosu od 6.650,00 KM, te obaveze prema još tri fizička lica u iznosima 2.900,00 KM, 1.000,00 KM i 500,00 KM

<sup>3</sup> Obaveza prema Željezari Zenica